

11/08/2003

Masyarakat Islam Sri Lanka kagumi Dr Mahathir

Nurul Adlina Kamaludin

COLOMBO: Kewibawaan Datuk Seri Dr Mahathir Mohamad sebagai perdana menteri tidak hanya dipuji rakyat Malaysia, malah turut dikagumi kalangan masyarakat Islam di Sri Lanka.

Mereka yang ditemui media Malaysia yang meninjau proses damai, pelaburan dan pelancongan Sri Lanka di beberapa daerah negara itu sejak 1 Ogos lalu, menyifatkan Dr Mahathir bukan sekadar pemimpin Kuala Lumpur tetapi tokoh Islam yang berani menyuarakan pendiriannya tanpa berasa takut atau gusar dengan ancaman Barat.

Peniaga batu permata, Azmi Hassan, 43, yang ditemui di Negombo, menyifatkan Dr Mahathir sebagai lambang suara keberanian negara Islam.

"Saya amat kagum dengan keupayaannya yang terbukti berani, lantang dan bijak. Buktinya, beliau berjaya menukar Malaysia daripada negara kecil yang tidak dikenali ramai kepada sebuah negara contoh.

"Bukan itu saja, beliau juga berani bangkit menyuarakan pendapatnya bagi mempertahankan Islam dan menangkis segala imej negatif dilemparkan Barat ke atas agama suci itu," katanya.

Azmi yang berulang alik mengusahakan perniagaannya antara Sri Lanka, Singapura dan Kuala Lumpur turut mengangap persaraan Dr Mahathir Oktober depan, adalah satu kehilangan besar kepada negara Islam.

"Tidak ramai pemimpin sedemikian. Sebagai rakyat Islam, sudah pasti saya berada sedih dengan pengundurannya itu," katanya yang memiliki status pemastautin tetap di Singapura.

Di Trincomalee, pekerja sebuah hotel di bandar bekas kubu kuat Barisan Pembebasan Harimau Tamil Eelam (LTTE) di timur negara itu, Mohd Jaafar Kassim berkata, Malaysia seharusnya berbangga kerana mempunyai pemimpin berwibawa seperti Dr Mahathir.

"Beliau adalah pemimpin yang mempunyai pendirian tegas dan tidak mudah mengalah. Malaysia sendiri adalah negara kecil seperti Sri Lanka, tetapi ia kini jauh lebih moden dan maju hasil usaha Dr Mahathir. Persaraannya itu nanti adalah satu kehilangan besar," katanya.

Di Kandy, bandar peranginan terkenal Sri Lanka, pengusaha Hotel Muslim, Ibrahim Zamri berkata biarpun tidak pernah bersemuka dengan pemimpin Malaysia itu, ramai penduduk Islam di kawasannya kenal dan kagum dengan Dr Mahathir.

"Kami berasa gembira adanya pemimpin sepertinya yang tidak gentar dengan pihak Barat. Dunia Islam memerlukan ramai pemimpin seperti Dr Mahathir, apa lagi di saat getir sekarang yang menyaksikan Islam menjadi mangsa propaganda Barat," katanya yang mengusahakan perniagaan keluarga yang diwarisi turun temurun itu.

Seorang peniaga gerai, Abdul Samad Mohd Siddek, 44, berkata beliau kagum dengan keupayaan Dr Mahathir memimpin Malaysia dan pada masa sama turut menyumbangkan bukti dengan menjadi suara negara Islam.

"Siapa tidak kenal dengan Dr Mahathir dari Malaysia. Apa yang disuarakannya sering menjadi perhatian ramai baik yang beragama Islam atau yang bukan Muslim. Lihat saja bagaimana beliau menangkis tohmahan Barat yang menggunakan kempen antipenganas untuk menindas Islam," katanya.